

四庫全書

集部

欽定四庫全書

文忠集卷一百七

玉堂類藁七

宋 周必大 撰

賜臣僚請免詔三

淳熙三年

賜新除少傅士輅辭免令所司擇日備禮冊命

宜允詔

正月十四日

延拜公孤具存故事蓋將涓選穀旦端委御朝擬金石

旅簪鞞而後命之所以辨等列隆威儀也惟茲禮不講
爲日已久庶因太上非常之慶褒錫宗室之老使在廷
之士有榮觀焉胡為抗章力斲寢免易不云乎勞謙君
子有終吉勉從冲守尚永迪壽祉之榮所請宜允

賜武康軍節度使捧日天武四廂都指揮使提
舉隆興府玉隆萬壽宮吳拱辭免召赴行在
不允詔

卿深練武經克承世美久總師干之任比膺齋鉞之榮

固宜修王覲之恭奚可遂家居之樂况朕每聞於輦鼓
必念將臣如卿雖遠於江湖寧忘魏闕益思此義載疾
其驅所辭宜不允

賜皇子雄武保寧軍節度使開府儀同三司判
明州軍州事兼沿海制置使魏王愷辭免加
食邑食實封不允詔

朕惟太上皇帝盛德大業冠映往初眉壽隆名綿延億
載乃甲午詔書推慶澤於中外者博矣而况位重真王

任隆分陝是固恩徽所宜先也書不云乎身其康彊子孫其逢吉尚奚遜焉所辭宜不允

賜皇子魏王愷再上表辭免加食邑食實封恩

命不允不得再有陳請詔

奉萬歲之觴巖盛儀於東內封三錢之府均大賚於多方念我賢王適臨重鎮乃首敷於邦渙俾增入於戶租非獨示親親之恩亦將明貴貴之誼是故兩得奚為屢辭所辭宜不允不得更有陳請

賜龍圖閣學士承議郎提舉江州太平興國宮

胡銓辭免檢舉磨勘指揮恩命乞檢會前後

累奏許休致不允詔

二月九日

卿蚤持正論負九牧之名晚釋羣經得先儒之旨養恬
真館冠職西清恩章所加度越諸老惟是階秩以稽勞
能而卿周旋議郎殆四十載使踵長塗而序進猶當取
甘茂之十官况由禁路以陟明盖屢計成周之三歲寧
容廉退獨不舉行削牘以辭既非所望遂欲致君事而

去是豈乃心王室之誼哉所請宜不允

賜趙伯圭上表再辭免除安德軍節度使提舉

隆興府玉隆萬壽宮任便居住加食邑食實

封恩命不允不得再有陳請詔 二月十八日

朕以授鉞專征之任寵綏同姓可謂不敢輕矣既稟太上之命又稽祖宗之制又協卿士大夫之議然後出節少府讀命大庭如渙汗焉何可回也矧卿忱恂肅哲足以承寧方鎮端莊信厚足以翼衛王家政倚宗彊毋勞

謙挹所辭宜不允不得再有陳請

賜端明殿學士朝奉大夫簽書樞密院事王淮
辭免國史日厯所修進太上皇帝日厯經脩
不經進特轉行一官依例加恩恩命不允詔

朕述中興三十六載之政事備太上億萬斯年之觀覽
進讀之日慈顏悅豫臣庶呼舞惟時慶賞當與大臣共
之矧卿早被簡知雍容樞掾編摩時政與有力焉其當
賞一也拾遺諫省言聽計從皂囊所陳備載於冊其當

賞二也粵朕初載實為少令總領諸彥纂修成書其當
賞三也有是三者予惟汝嘉進階加邑初不為過又何
以遜避為哉所辭宜不允

賜朝奉郎試禮部尚書趙雄辭免經脩太上皇
帝日懋特轉行一官恩命不允詔

惟我聖父聰明文思光澤天下而遜於位閔休偉績布
在簡牘視堯典若合符節茲吉日辛亥陳儀展采尊奉
於大庭此固三代兩漢以來不可得而見者孰若吾身

親見之哉卿昔以敏識英詞秉筆於東觀今以洽聞殫見總議於南宮俾是書克成而禮容無爽者卿與諸儒助朕之力也進官一列實侈榮懷其懋承之毋勞固避

賜資政殿大學士中大夫知鎮江軍府事沈復

乞除一在外宮觀差遣不允詔

朕夙宵念治常患二千石不皆得人使吾德澤不下流民隱不上達方詔在位雜舉循良之吏而卿以帷幄近臣與股肱名郡茲固朝廷所嘉賴四方所則倣者也曾

未半歲曰需政成豈因鼯瘍遂欲求去假樂之詩曰百
辟卿士媚於天子不懈於位民之攸墜此言畿內諸侯
愛君勤職斯民所由休息也勉遵古誼倡率庶邦稱朕
意焉所請宜不允

繳奏沈復辭免慶壽加恩不合降詔

四月

今月十一日準御寶封付下資政殿大學士中大夫
知鎮江軍府事沈復辭免該遇太上皇帝慶壽赦書
加食邑奏劄一道奉御寶批降詔不允當院伏見近

降指揮因慶壽合該加恩官止降制給告免辭免後
來自使相執政已下並已遵行今來沈復竊恐合依
前項指揮更不降詔緣此未敢便行具草進入如合
聖意乞許本院一面咨報尚書省劄下沈復照會伏
取進止 奉御筆批依

賜敷文閣直學士中奉大夫提舉江州太平興
國宮張津辭免知建寧府恩命不允詔

卿精明強濟練達恪勤更歷六卿夙高朝望周旋數郡

屢考民功載錫之符往臨閩服蓋用人莫如求舊擇守
莫如已試古之道也又何遜焉所請宜不允

賜昭慶軍節度使知荆南軍府事充荆湖北路

安撫使楊倓乞畀祠祿不允詔

昔我祖宗擢任邊帥近者十年久或倍之固未嘗踰歲
而聽其去也卿選自籌帷鎮臨荆渚殫竭智慮予心載
寧今軍容壯矣不可以棄爾成民俗安矣蓋有以善其
後奚為引疾願上印章詩不云乎夙夜匪懈處共爾位

朕固不忘榦方之績也所請宜不允

賜敷文閣直學士中奉大夫陳彌作辭免提舉

江州太平興國宮恩命乞守本官職致仕不

允詔

朕惟卿庶介彊明久更任使乃身雖外念之不忘又惟卿爵齒浸高閔勞以事故推祠祿即拜於家優禮近臣庶幾兩得胡為避寵遂欲掛冠語知止則可矣在體國則未也尚欽予命時告遠猷所請宜不允

賜奉議郎試尚書吏部侍郎趙粹中乞除郡不

允詔

朕旁求衆賢穆布在位豈容法從輕去周行卿負卓絕之才而濟以文躬端莊之操而歸於厚久膺殊獎升冠貳卿方藉論思寧拘更迭昔畢公乃心王室而望之雅意本朝何卿之言獨異於是勿思為郡之樂益懋敬王之心所請宜不允

賜安慶軍承宣使提舉德壽宮張去為辭免特

轉一官聽回授不允詔

事親之樂與天無窮惠下之恩曷日而已故屬者方慶
慈極萬年之壽而今茲復稽宮庭五載之勞眷言審謹
之舊人首被褒優之異數理無可避往肅而承所辭宜
不允

賜觀文殿大學士銀青光祿大夫知福州陳俊
卿乞檢會前奏除一在外宮觀差遣不允詔

六月十八日

比覽忱言願從祠秩璽書往報桑蔭未移奚守一謙乃
勤再請惟帥藩之求代須對奏之有辭非公家之務困
於劇繁則私室之誠從而休迫今卿重臨樂土實總故
鄉事簡政清不必牛羊之參問疆連壤接是惟雞犬之
相聞加齒髮之未衰且士民之方信毋念浮邱之袂姑
榮翁子之衣所請宜不允

賜中大夫提舉江州太平興國宮姚憲辭免差
知太平州恩命乞且令依舊宮觀不允詔七

月七日

牛渚而上有名郡焉俗媿而人淳奉優而事簡中興以來間起執政舊臣為之守所以重蕃宣彰眷禮也鄉頃繇才望參秉事樞去位二年靡忘簡注適茲調守亟以命之趣駕朱轡毋違朕命所辭宜不允

賜隨龍延福宮使保信軍承宣使提舉佑神觀
李綽辭免落階官除正任承宣使不允詔九

月七日

朕念潛藩舊人存者無幾故雖中涓之屬暫御之臣每示恩榮以昭予意而況久司宮省勤恪有聞退處祠庭安恬無咎如汝綽者乎是固朕心所不能忘也正其使範假寵甚優往體眷懷毋為飾避所辭宜不允

賜趙伯圭上表再辭免除開府儀同三司充萬壽觀使進封天水郡開國公加食邑食實封

恩命不允不得再有陳請詔

十月十六日

漢以外戚車騎將軍鄧騭儀同三司官名之立實基於

此元豐而後尊禮天屬多由節鉞進領斯任親親賢賢
蕃衛王室古今一也卿高明弗抗和易不流踐歷庶僚
貴名日起躋登顯服華問益昭班視衮章象參台曜人
以為允朕何敢私遜避之言固非矯激遂欲反汗不其
難乎所辭不允不得再有陳請

賜武康軍節度使捧日天武四廂都指揮使右
金吾衛上將軍吳拱辭免除侍衛馬軍都指

揮使恩命不允詔

十月二十七日

國家萃驍騎於羽林總以一帥雖副貳虞度之名不輕
畀付而况極其使領倚重可知卿執勇沉雄世號山西
之良將忠實詳練嘗典紹興之禁旅召從蜀道寘在環
列固欲用之也會茲謀帥首及舊人卿而不能尚誰可
者所辭宜不允

賜朝散大夫權吏部尚書韓元吉辭免除吏部

尚書恩命不允詔

十一月

孟軻有言所謂故國者非喬木之謂也有世臣之謂也

昔在仁祖得臣曰億純明忠諒厥有賢譽肆其三子交
秉事樞緊乃顯考德業尤著不隕世美庶幾在卿朕固
嘗試之掌制而嘉其文學之優進之典銓而知其識慮
之敏比還禁路彌簡予心總領從官亟加顯用世臣有
後多士所榮報國承家既知勉矣執章避寵豈所望哉
所辭不允

賜中奉大夫蔡洸辭免除徽猷閣學士與郡恩

命不允詔 十二月二十三日

勅蔡洸省所奏辭免除徽猷閣學士恩命事具悉六閣
邃在西清學士班於內朝蓋朝夕論思之臣而非賦政
於外之官也雖然入為左右常伯出則下同庶常庶陞
之間等級奚辨故假侍從清華之職用為近臣出處之
光馭下以恩予心至矣卿才猷行義力世其家謙懿恪
勤不懈於位再司邦賦經費無虧請去之章奚為沓至
重違懇惻特昇隆名深體眷懷毋堅遜避所辭宜不允

淳熙四年

賜龍圖閣學士朝散大夫提舉江州太平興國

宮胡銓陳乞致仕不允

正月十六日

朕惟人臣有奮忠鯁而辭不撓涉患難而氣不衰豈獨
國家所當尊禮哉天必相之矣是故位雖高無盈滿之
慮年雖至有康彊之福士大夫方倚以為重而朕聽其
納祿可乎又况燕佚殊庭弗勞以事從容故里惟適之
安豈必退休以孤眷矚所請宜不允

賜觀文殿大學士金紫光祿大夫知福州充福

建路安撫使陳俊卿乞差在外宮觀一次不

允詔二月

卿畫繡故鄉連四千石之重誰謂閩遠政聲則聞蓋民
安如曹參之治齊教明如召伯之分陝方寬予顧胡棄
爾成且知止足而樂燕閒衆人之情也宣上德而倡九
牧大臣之事也勉勤綏御毋弗注懷所請宜不允

賜中奉大夫提舉江州太平興國宮胡元質辭
免知荆南及復敷文閣直學士恩命不允詔

二月

勅元質省所奏劄子辭免除帥及復敷文閣直學士恩
命事具悉朕愛惜近臣有如寶玉塵垢或止旋洗濯之
卿政事文章為朕所器邦有大賚首選舊班謀帥荊州
詔除甫下擁旄全蜀閩寄滋隆式邁其行毋替朕命所
辭宜不允

賜新復敷文閣直學士中奉大夫胡元質辭免
除四川安撫制置使兼知成都府恩命不允

詔

天文參井之度地志梁雍之域祖宗盛時方鎮莫重焉
今復合四路之權總於一帥凡兵民之利害官吏之否
臧大者驛聞餘得裁制選掄加重抑又可知非有文翁
之文武侯之武忠勤篤實為朕倚信者不輕畀也差撥
近列謂卿為宜已趣造朝是將臨遣勉思叱馭毋或循
牆所辭不允

賜通奉大夫參知政事龔茂良辭免進呈安奉

玉牒特轉兩官依例加恩恩命不允詔

朕惟昭陵盛德大業豐功偉績不可勝紀其所以覆幬萬物垂裕後世者尤在乎仁也茲撮機要著之寶牒而有司復以乾道近事同時奏篇如朕涼薄安敢望高皇帝亦曰儀式刑文王之典日靖四方而已卿才經物表學貫道原久裁政機衆職交舉復以餘力纂成二書特畀醜恩用示褒勸朕於爵賞豈嘗妄加卿宜知之毋避可也所辭不允

賜通宜大夫參知政事李彥穎辭免進呈安奉

徽宗皇帝實錄特轉兩官依例加恩恩命不

允詔

朕惟昔者秦陵之政有因有革同歸於治而紀次之初
是非失實紹興判定乃為信書比命使臣載纂徽錄亦
是意也不然二十六年仁民愛物之實制禮作樂之具
皆將疏略失傳而一時用事之臣虛美隱惡亦將無以
考信於來裔矣卿才推國器學擅儒宗二柄迭司具宣

之雄祕殿敷經特創班聯之峻極隆儒之異選垂異世
之通規非我老成孰參榮遇卿英姿邁往敏識鄰幾以
高明之學傳初潛以康濟之謀毗大政若金汝礪諒納
牖之未忘毋玉爾音豈遐心之或有肆稽舊典增責新
章越升亞保之班入奉列真之館肇封樂國增衍爰田
讀倚相之書朕方勤於稽古卒桓榮之業卿宜切於告
猷引避之言非予所望所辭宜不允

賜大中大夫提舉臨安府洞霄宮王炎再辭免

復資政殿大學士恩命不允不得再有陳請

詔

朕待遇臣鄰極其恩意而況久勞蜀道嘗冠樞庭茲固夙夜不能忘體貌所宜先者也屬當謀帥允藉壯猷既以疾辭義實難強是因郊賚特昇隆名眷矚有加於茲見矣遜章疊上豈所望哉所辭宜不允不得再有陳請

賜皇子雄武保寧軍節度使開府儀同三司判

明州軍州事兼管內勸農使兼沿海制置使

魏王愷辭免除荆南集慶軍節度使行江陵
尹加食邑食實封餘如故恩命不允詔

朕觀成周盛時分封子弟布於侯甸其來朝也錫之路
車乘馬子之元袞及黼其有功也寵以加地進律賜以
鈇鉞圭璜皆所以榮骨肉之恩強磐石之宗享國久長
用此道也惟子賢子躬受偉材本之以忠孝文之以詩
書出治鄞水吏民安焉茲奉介圭少留漢邸親親貴貴
當有異恩高賚美名一新疊組仍加尹節增賁東藩僉

論既諧慈衷以懌蓋古者七命賜國八命作牧九命作伯是惟不易之序又何以遜避為哉所辭宜不允

賜資政殿大學士大中大夫知建康軍府充江

南東路安撫使兼行宮留守劉珙辭免除觀
文殿學士恩命不允詔

勅劉珙省所奏劄子辭免除觀文殿學士恩命事具悉
屏翰行都昇為重鎮朕肱宿望卿實闕才二年於茲道
洽政治禮曰牧以地得民卿之謂矣又曰爵以馭其貴

予可後乎學士之以殿名不過三等昔卿嘗歷其中
外固已榮之今復進紫宸之班隆舊弼之禮庶幾五長
各迪有功勸勉所關毋留朕命所辭宜不允

賜通奉大夫參知政事龔茂良乞除一在外宮

觀差遣不允詔

六月七日

朕兢業萬幾簡求四近知之深故任之久任之久故倚
之隆若時具瞻豈可輕去卿精於學問裕於才猷一贊
政機屢更歲律辨察衆職勤勞百為方藉同寅共圖熙

載胡然引疾遽爾祈閒既非朕仰成之心亦非卿許國之誼勉安厥位毋拂予懷所請宜不允

賜通奉大夫龔茂良辭免除資政殿學士知鎮

江府恩命不允詔

六月十日

本朝優待輔臣甚非漢唐之比雖久煩以政間許均勞然恩典所加每從其厚既華之以峻職又付之以近藩出處之間厥有榮耀朕率是道以厲臣節卿淵謀敏識與學瓌才夙被簡知晉參機務累年於此厥績茂焉求

退既堅重違雅志豈無異數以寵其行蓋臣之事君能
合去就之義則上之遇下當全進退之禮往欽時命尚
考民庸所辭宜不允

賜通奉大夫龔茂良再辭免除資政殿學士知

鎮江府乞許奉祠不允詔

六月十一日

卿久翊政機宜宣忠力抗章辭疾有慨予心加職典藩
務隆國體何游形於封奏似未亮於眷懷且卿昔帥嶺
南兵民戢其威惠旋臨江右旱澇資其撫綏曾是樂郊

豈勞卧治九里蒙潤固未遠於行都四方于宣尚勉圖
於嘉績所請宜不允

賜中大夫新除參知政事王淮辭免差權提舉
國史院編脩國朝會要所恩命不允詔 六月

二十二日

仲尼善志約魯史之舊章魏相有聲條漢家之故事惟
今太史做古宏模眷子亮采之賢付以提綱之任卿經
邦道廣緯國文高久踐機廷聿著良平之畫參陪台路

方追房杜之謀宜總諸儒遂榮兩命矧翱翔苑囿嘗
筆削四朝之書而領袖蓬山亦既纂脩一代之典茲延
登於貳政乃因任於三長其趣奏篇毋勤遜牘所辭宜
不允

賜觀文殿大學士金紫光祿大夫陳俊卿辭免

除特進恩命乞依舊官職奉祠不允詔

七月

十九日

賜位之尊蓋循兩漢班朝之貴實次三公非嘗踐於台

衡靡輕加於秩序卿純明無偽方重有常求福得不回
之風事君明以道之義久儀揆路務清靜以寧民再位
鄉邦每中和而布政屢披封奏祈即燕閒既深諒於乃
誠宜特隆於異數茲惟念舊亦以疇庸毋尚執於謙懷
亟共承於朕命所辭宜不允

賜朝議大夫權尚書禮部侍郎兼同脩國史兼
侍講兼權工部侍郎李燾辭免除禮部侍郎

恩命不允詔 八月四日

貳卿再歲為真雖曰故事然量才錄德乃人主之柄豈專以日月為限哉卿性資簡廉學問淵博策名委質今四十年潛心史家景行先正凡列聖之功德一代之制度忠邪之議論夷狄之叛服表年提要總為巨編自建隆迄於靖康成書殆且千卷使朕覽觀乎家法興起乎治功有臣若斯其益多矣春官惟亞何以假為尚尊所聞毋或遜避所辭宜不允

賜龍圖閣學士朝散大夫胡銓辭免差提舉隆

興府玉隆萬壽宮恩命仍乞休致不允詔

卿壯猷宏議簡在朕心未嘗忘也重以吏事煩吾耆老
故稽歲月申命祠庭賦祿養賢厥惟古誼使子弟孝悌
而忠信則國家安富而尊榮不素餐兮孰大於是趣其
承命毋致為臣所請宜不允



文忠集卷一百七

欽定四庫全書

集部

文忠集卷一百八

詳校官庶吉士臣李傅熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣杜文海

欽定四庫全書

文忠集卷一百八

玉堂類藁八

宋 周必大 撰

賜臣僚請免詔四

淳熙四年

賜觀文殿大學士金紫光祿大夫陳俊卿再辭
免除特進恩命只乞依舊官宮觀不允不得

再有陳請詔 九月六日

朕惠宗公以禮篤舊學以思雖聽均休必昭異寵卿清
名諒節終始無渝入相出藩進退有裕因奉祠之請極
其祿之階恩禮所加他人莫望遇臣闕 朕心蓋庶幾
焉且長樂二年其勞多矣潛藩三益其功舊矣以茲受
爵卿豈無名所辭宜不允

賜徽猷閣直學士通奉大夫提舉江州太平興
國宮徐嘉辭免特轉一官致任恩命不允詔

九月十四日

國朝定制自九品而上凡致軍事者必增秩寵之所以
獎廉退厚風俗也况卿登第於宣和侍從於紹興材猷
敏明朕所嘉獎年其耄矣納祿告歸不進文階何以馭
貴辭之為贅往即欽承所辭宜不允

賜定江軍節度使侍衛親軍步軍都指揮使興
州駐劄御前諸軍都統制吳挺乞除一宮觀
差遣不允詔 九月二十九日

昔卿伯父暨乃先臣繼提蜀師多歷年所厥有成績著

於西陲雖曰折衝之良亦惟久任之效卿選繇世將肇敏前修方整暇之有聞豈燕閒之可議况年纔強仕正當一意於功名而日奉慈親何害兩全於忠孝勉酬朕睽毋費爾辭所請宜不允

賜朝請大夫權尚書刑部侍郎兼侍講兼權給事中程大昌辭免除刑部侍郎恩命不允詔

十月六日

朕勿諳於庶獄惟有司之牧夫其在秋官厥艱付畀卿

學術議論篤於古而切於今服采在廷秉誼堅確攝貳
憲部惟明克允參稽陟典升正其班昔舜疇咨九宮皋
陶以申命而無避汝之作士其亦久矣往踐乃次尚奚
遜哉所辭宜不允

賜朝議大夫權尚書吏部侍郎司馬伋辭免除

吏部侍郎恩命不允詔

十月七日

自唐以來稱典選之能者必曰前有馬裴後有盧李及
考其涖職則遠餘十年近或六載美成在久朕甚嘉之

卿抱負才猷踐揚中外擢司銓綜歲聿再周敏明而將以勤練達而濟之審不加真拜何以勸功詔縉身章並從異數勉圖來譽將益汝知曾是進遷豈勞謙避所辭宜不允

賜敷文閣直學士朝請大夫提舉隆興府玉隆萬壽宮秦壩辭免差知饒州恩命不允詔十

月二十七日

卿傳業相門躋榮禁路既久安於家食乃自詭於民庸

恩昇郡章禮優從索聞會稽之問誠有望焉辭伯石之
卿顧何取彼所辭宜不允

賜數文閣直學士朝請郎范成大辭免除權禮

部尚書恩命不允詔

十一月二日

厥今往鎮莫重坤維嘉我寶臣介圭來覲疇庸錄德當
寘諸朝卿人物之英搢紳所重代言分閭左右具宜使
蜀再暮政尤可紀茲從嚴召入告嘉猷峻陟禮卿丕昭
眷獎有周吉甫文武憲邦其自鎬歸實多受祉爾幾於

是何以遜為

賜龍圖閣學士中大夫提舉江州太平興國宮

林安宅乞休致不允詔

十一月四日

古者任其事乃食其祿故士大夫年至則告歸所以佚老也本朝優禮耆耋賦祿殊庭而不敢以事諉焉忠厚之風過於前代遠矣卿處躬廉約蘊識通明爵齒俱高朕所禮貌奉祠居里足以自娛正使垂車又何加此勉承恩遇姑抑素懷所請宜不允

賜端明殿學士朝散郎簽書樞密院事趙雄辭

免除同知樞密院事恩命不允詔

十一月四日

朕觀漢高帝知人善任使故凡當世豪傑皆樂從之游
至於運籌帷幄之中決勝千里之外則惟子房而已此
豈獨人力哉天授之也卿蘊有用之學濟非常之才應
劇易於折枝決疑明於大蔡本吾兵柄踰歲於茲多士
肆其設施遠人咨其聲譽君臣契合視古庶幾惟延登
峻則望益隆惟屬任專則功易見厥惟高選豈曰序遷

成命已行毋勞控避所辭宜不允

賜觀文殿學士大中大夫知建康軍府事充江
南東路安撫使兼行宮留守劉珙乞差在外

宮觀不允詔

十一月十二日

昔君陳畢公咸懋厥德尹釐東郊惟成暨康既已膺保
多福而彼二臣亦俱享永世無窮之聞著在簡冊朕心
嚮焉今之秣陵周之洛邑也以卿閎才碩德嘗踐股肱
之任故命居守庶幾前人簡修進良別慝瘴惡三載如

一顧憂以寬論年齒則未高語節宣則無爽寧容均佚
咈我注懷益圖爾休冀京師并蒙福也所請宜不允

賜通議大夫參知政事李彥穎乞解罷機政不

允詔 十一月十六日

卿進繇德望參秉事樞惓惓於納忠而未嘗近名孜孜
於奉職而見謂知體中外寧謚陰陽燮調民亶爾瞻予
資汝翼定契如金石久方益堅相須如股肱理不可易
豈以晦明之或爽乃於去就而輕言矧已造朝初無它

恙深念倚毗之意迄攄康濟之謀所請宜不允

賜通議大夫參知政事李彥穎上表再乞解罷

機政不允不得再有陳請詔

十一月十七日

朕每念為君之難自朝至於日中晷不遑暇食既躬攬
丕務又博詢衆言幸今方內小康民俗嘉靖豈敢自以
為功哉亦惟二三執政畢精竭慮協恭亮采之助也卿
以忠醇篤實總領衆職期予於治朕有望焉奈何股肱
之力方陳而羸悴之語遽聞腹心之倚方切而退休之

請狎至率作興事獨不念臯陶之颺言乎章雖頻煩朕弗聽也所請宜不允不得再有陳請

賜新除端明殿學士知江陵府姚憲乞除一在

外宮觀不允詔

十二月二日
元係中大夫知泉州

朕以卿泉南之政明而不苛治辦而不擾是用復麟趾名官之舊府鷄尾一道之寄所以待卿者寵矣便道之鎮方茲趣行邱園之言何自而至亟開幕府稱朕意焉所請宜不允

又詔

勅姚憲省所奏劄子辭免除端明殿學士知江陵府恩
命乞檢會前奏除一在外官觀差遣事具悉建牙閫外
以嚴節制之權著籍殿中以重朝廷之體若時舊弼斯
稱茂恩卿恢廓精明恪勤敏濟州符使節嘗宣力於神
臯樞院政機旋惠疇於兩社積其望實溥我龍光自起
殿於藩方每逖聞於課最申頒異數用獎多庸十國為
連兼付兵民之重羣州承措共觀條教之新式駿爾行

難遷子令所辭宜不允

賜徽猷閣學士中奉大夫知寧國軍府事蔡洸

乞除一宮觀差遣不允詔

十二月十二日

維乃重祖事子仁皇總邦財則以贍足聞涖民事則以
威惠著朕固嘗嘉歎其賢而易名於百年之後矣先烈
之不墜繫卿是圖主計典州眷焉克紹日需報政惠此
潛藩豈以微疴遽容自佚式造藥喜稱朕寵遇世臣之
心所請宜不允

賜觀文殿學士大中大夫知建康軍府充江南

東路安撫使兼行宮留守劉拱乞檢會前後

奏章差在外宮觀一次不允詔

十二月十四日

卿以爽邦俊德倡率凡牧智慮所及何事不濟恩威所
加其誰不服乃者旌崇治效循用漢制蓋嘗璽書勉勵
增秩而賜金矣重開幕府未踰歲也而囊封疊上累致
百言畏避寵榮殆三致意是豈慷慨事功匪躬一節之
誼哉勉為朕留迄成美化毋使因任之詔徒為虛文也

所請宜不允

賜敷文閣直學士朝請大夫秦頊辭免改除知

舒州恩命不允詔

十二月二十七日

卿名參侍從踰二十年起分左符詔許未覲因其自列
易地以居朕於故家可謂恩矣且鄱雖支郡其民重其
事繁於為政也難舒雖節藩其民淳其事簡於為政也
易相攸之易夫豈徒然節用愛人敬事而信以此道千
乘之國私心安而公論愜矣何以遜避為哉所辭宜不

允

淳熙五年

賜朝議大夫試尚書吏部侍郎司馬伋乞一在

外宮觀差遣不允詔

正月十日

卿性資夷雅識慮精明方倚通才有華近侍間嘗移疾
日僕造朝奚為自列於公車遂欲即安於祠館雖東野
之失二子難忘幹蠱之私然商瞿之有五男足奉含飴
之樂勉安厥次難徇爾誠所請宜不允

賜中大夫新除知江陵軍府事姚憲再辭免除

端明殿學士恩命不允詔

正月十一日

朕懷政路之舊勞則茂隆於寵數賁帥藩之新組則增
煥於榮名篤一誼以申恩俾羣臣之知勸卿既肅詔函
而趣駕豈容持謙柄以飛章矧名諱之不偏實古今之
共守恪遵前詔勉輯來庸所辭宜不允

賜奉國軍節度使殿前副都指揮使王友直乞

除一宮觀差遣不允詔

正月十九日

卿忠而善謀勇而好禮上為國家所倚信下為士卒所畏服有將如此人其捨諸且環列之尹至榮也萬鍾之祿至厚也以是將母固可得其懽心而何恙之不已耶所請宜不允

賜武泰軍節度使開封儀同三司充萬壽觀使

曾覲乞致仕不允詔

正月二十二日

古者大夫有服采之勞故七十則致事由卿而上已不著引年之禮况夫視儀台路未嘗任職遂欲得謝不其

難乎卿氣槩沉雄智謀閎遠詩書之府仰止古人忠義
之開根於天性八年宿衛一意董齊升正中權宜符衆
望久虛之典宜懋承之所辭宜不允

賜少保觀文殿大學士充醴泉觀使侍讀永國

公史浩乞休官不允詔

二月六日

惟我祖宗禮遇故老內祠經席便於諮詢而一時宗工
宿儒亦因不心在王室至有請覲而願留者上下之間
交致誠敬朕甚慕焉乃者起卿於故鄉待卿以優禮蓋

率是道庶還舊章卿既以昔賢之心為心為朕肯來矣
尚循黃髮則罔所愆閱歲方新豈容遽去善養老者朕
方追西伯之風以為已歸卿當法太公之義所請宜不
允

賜奉國軍節度使殿前副都指揮使王友直辭
免除殿前都指揮使恩命不允詔

二月四日

關

賜武泰軍節度使開府儀同三司充萬壽觀使
曾覲再上表乞致仕不允不得再有陳請詔

正月二十五日

朕惟士大夫年至而必去者大槩有二筋力憊於馳驅
精神憚於酬酢一也故鄉可歸思晝錦之樂家庭在邇

想蘭菊之生二也今卿茂者明之識兼將相之官燕息
內祠身固逸矣賜第北闕去將何之而需章繼來辭授
情確罕由斯道固無今日之譏偕賦帝京何待引年之
後勉回冲守庸體眷懷所請宜不允不得再有陳請表

引唐罕由斯道
偕賦帝京事

賜朝散大夫試尚書戶部侍郎韓彥古辭免除

權戶部尚書不允詔 二月六日

闕

賜少保觀文殿大學士充醴泉觀使侍讀永國
公史浩上表再乞致仕不允不得再有陳請

詔

卿往歲連貢封章懇還印組勇退既孚於衆論眷留獨切於予懷學於甘盤方且念高宗之舊居乎魏闕正宜推公子之心何容控於忱誠似頓忘於雅素富與貴得以道况非不處之時明且哲保其身更思匪懈之誼毋貪廉士之小諒而廢老臣之大方所請宜不允不得再有陳請

賜朝議大夫試吏部尚書韓元吉乞授一州郡

不允詔

二月十九日

卿辭章麗則議論通明其在故家號為翹楚朕所獎擢
異乎諸臣方藉廉平澄清銓選益資獻納倡率從官何
嫌何疑遽欲治郡姑安爾職毋復有云所請宜不允

賜敷文閣直學士中大夫知紹興軍府事充兩

浙東路安撫使張津乞改差一在外宮觀差

遣不允詔

三月一日

久於任人則有成功熟於治郡則無過舉此古今不易
之理也卿材猷肅給政術精明典選守藩備宣乃力彌

年於越績效寔彰上書求閒殊拂予意且年豐用足弊革訟稀於茲居簡而臨民足以清心而省事奉祠之樂又何加焉所請宜不允

賜通議大夫參知政事李彥穎乞解罷機政除

一在外宮觀不允詔

三月十三日

執政之臣朕所注意而民所具瞻也進退之際豈容或輕卿篤實安和通明敏茂周旋二府累年於茲庶事浸康百工允治方隆眷倚其可去朝且卿昔以疾言尚有

可諉今心志益壯筋力益強復圖便安斯亦何義勉安
殿位毋拂予懷所請宜不允

賜通議大夫李彥穎辭免除資政殿學士知紹

興府恩命不允詔

三月十四日

卿質直好義恭儉惟德本之以學識華之以文藝立朝
十載貴名起焉與政四暮庶績凝焉乃自冬徂春求去
彌確朕既不能奪卿之志矣鉅藩峻職又何愛焉夫朝
釋柄於廟堂夕擁旄於帥閫出處榮矣班不離乎內殿

地未遠乎王室待遇至矣尚體茲意毋形遜章所辭宜不允

賜李彥穎再辭免除資政殿學士知紹興府恩

命不允不得再有陳請詔

三月十七日

殿以政名非舊弼鮮能至者帥由廷授惟通才乃克當之茲均參輔之勞誕錫兼榮之命卿體業端亮風規粹清逢辰有為秉誼弗懈進裁丕務方倚於壯猷退保令名遽辭於高位聯宸宇之秘職剖藩侯之左符體貌大

臣在予良厚股肱近郡於爾不遐已疊下於詔函毋固持於謙柄所辭不允不得再有陳請

賜少保觀文殿大學士充醴泉觀使侍讀永國

公史浩辭免特授右丞相進封魏國公加食

邑食實封恩命不允詔

三月十九日

昔在仁祖有名相曰士遜始也師友潛藩致直諫之益中也輔贊初政立太平之基寶元康定之間年彌高矣爰以舊德仍踐相位功名福祿悠久光明著在信書朕

用嘉尚今卿有復貫蹈中之學有致君澤民之心定契於談經之初奮庸於受禪之始久安於外比趣其歸鼎席方虛肆加圖任卿其推往歲未攄之蘊勵老臣益壯之猷使朕收論相之功而卿極經邦之效庶追前烈輯寧我家遜避之言蓋可略也所辭宜不允

賜少保右丞相史浩辭免提舉編修玉牒提舉國史院提舉編修國朝會要所提舉勅令所

恩命不允詔

四月十七日

漢興相國何首定律令厥後置太史公凡天下計書先
上焉其副乃上相府當時謂序事如春秋然則約史定
令並付台宰非特本朝故事亦漢制也况卿學成而識
愈高年耆而智益明往在初元已司大典今加四組其
又奚辭且孝宣中興魏相有聲者正以總領衆職甚稱
上意也今吾丞相何慊焉所辭宜不允

賜中大夫叅知政事趙雄辭免同提舉勅令所

恩命不允詔

自天聖中呂夷簡以貳政之臣同定編勅厥後二府遂
為故實蓋進而叅道揆於一堂之上退而明法守於三
尺之中皆大臣事也卿學足以洞古今識足以周利害
制而用之謂之法神而明之存乎人損益之間足行所
學傳不云三王為法令也合於人情顧豈與詩書異指
哉所辭宜不允

賜中大夫叅知政事范成大辭免權監修國史

日歷所恩命不允詔

恭惟真宗眷禮王旦粵以叅豫假之史權舊章具存朕
用時憲卿負造微經遠之識兼廣記備言之長頃游著
廷夙搆華問今踐政路往提大綱惟中興諸臣逸事之
未補而時政鉅典屢書者無窮勉飭纂修毋庸控避所
辭不允

賜少保右丞相史浩再辭免提舉編修玉牒提

舉國史院恩命不允不得再有陳請詔

四月

十八日

史局名雖不同其是非筆削一也昔者左右置相固當分領茲予圖任舊德獨專宰柄其兼舊職抑有故常况卿在太上時蓋已纂修寶牒既初相朕又嘗提綱正史然則今日之命非卿舊物乎逡巡固遜何也所辭宜不允不得再有陳請

賜昭慶軍節度使知太平州楊佺乞除一在外

宮觀差遣不允詔

五月四日

當塗古號名邦在今日猶股肱郡也填臨於此非獨資

共理而已蓋亦示優異之恩焉卿夙負才猷嘗參機宥
刺裁劇務莫或告勞典治便藩固多餘裕胡為抗疏願
奉外祠既大拂士民惜留之心且將蹈守將數易之弊
勉綏乃服寧有後艱所請宜不允

賜特進觀文殿大學士提舉臨安府洞霄宮陳
俊卿辭免判隆興府恩命不允詔 五月八日

眷者哲則國體尊篤故舊則民風厚重帥守則威望著
用循良則主德宣合是四者內斷於朕心外協於公論

然後付卿以江右一道之寄其選可謂艱矣寧容引疾
遂已乎且出令如汗不可反也謀帥匪石不可轉也亟
承印紱毋使彼民興來暮之謠

賜奉國軍節度使殿前都指揮使王友直乞除

一宮觀差遣不允詔

五月八日

卿夙以公勤入衛王室雖周廬千列實賴訓齊然未有
出征遣戍之勞也大昕造朝山立俄頃過此以往無非
奉甘旨侍藥石之時何待奉祠始云將母第堅忠孝必

獲助於幽明詔旨屢頒豈不予聽所請宜不允

賜奉國軍節度使殿前都指揮使王友直再乞
檢會前後奏除一宮觀差遣不允不得再有

陳請詔

五月十日

古者王事靡盬至於不遑將母今卿拱護殿巖初未嘗
廢溫清之樂也惟忠與孝足可兼全求退之章奚為游
至雖陳詞懇切固孝於其親矣然國爾忘家方倚卿以
辦治軍事安可不念忠君之義乎所請宜不允不得再

有陳請

賜龍圖閣學士提舉江州太平興國宮林安宅

再乞致仕不允詔 五月十八日

朕聞明王貴貴而老老貴貴故優以爵祿老老故弗煩
以事是謂古今之通誼國家之盛禮所以待執政侍從
之舊而非百司庶常所敢望也卿嘗參四近當識朕心
奈何六載之間四來告老且禮經雖著引年之制豈不
繼以若不得謝之文乎恩意所加卿亦可以安矣所請

宜不允

賜朝請大夫試尚書刑部侍郎兼侍講程大昌

乞特除一小郡或在外宮觀差遣不允詔五

月二十五日

王制有言刑者例也例者成也一成而不可變故君子
盡心焉卿貳憲部再踰歲矣郵罰麗事惟既厥心而况
經術足以決疑文采足以華國方深眷簡求去何為所
請宜不允

賜武康軍節度使侍衛馬軍都指揮使吳拱乞

除一在外宮觀差遣不允詔 五月三十日

卿勇號冠軍任隆典午粵從遣戍頻歲於茲士飽馬騰
備聞整暇寬吾北顧藉爾長城均佚之言奚為而至善
加順養毋拂注懷所請不允

賜朝請大夫試尚書刑部侍郎兼侍講程大昌

辭免吏部侍郎恩命不允詔 六月二日

小宰之職法令備具惟明則吏莫能惑惟公則中有所

守必兼二者乃允斯任卿清通精審善於燭理洪毅堅
正難於奪志操此驗彼當官而行右銓雖繁吾得人矣
進遷惟寵尚無避哉所辭宜不允

賜中大夫叅知政事范成大乞解罷機政不允

詔 六月九日

入贊萬微實聯四近進退之際豈容或輕卿辭章雋明
術業闋茂翔南梁益弗已於行賜環來歸登用屬邇胡
為引疾遽欲退休姑體眷懷勉綏厥位所請宜不允

賜定江軍節度使侍衛親軍步軍都指揮使興
州駐劄御前諸軍都統制吳挺辭免兼知興
州恩命乞檢會累奏除一宮觀差遣不允詔

六月十四日

帥守一事也兵民一道也故賞罰足以服三軍之衆則
威惠必能得千里之心况爾先人嘗兼斯任棠陰未遠
世闕方隆徃以元戎復提郡印惟西平有子惟我有臣
勉倚寵光毋思閒適所辭宜不允

賜朝奉大夫試給事中兼侍講錢良臣辭免除

端明殿學士簽書樞密院事恩命不允詔 六

月二十三日

功名之會必與當世英傑共圖之卿以文武全材兼孝
恭令德朕初識擢即有大用之意然猶試之總賦以觀
其知略倚之專對以察其忠信演綸批勅又灼知其詞
章議論之美一旦寘諸宥密之地協贊規摹之遠師言
罔不穆士心罔不附知人則哲朕方自以為喜而卿過

為遜避何哉所辭宜不允

文忠集卷一百八

欽定四庫全書

文忠集卷一百九

玉堂類稿九

宋 周必大 撰

賜臣僚請免詔五

淳熙五年

賜中大夫參知政事趙雄辭免權監脩國史日

歷恩命不允詔

六月二十四日

編摩鉅典雖屬諸儒總領宏綱實資良弼蓋進則奉延

英之對退而裁東觀之書事既親聞理斯傳信卿詞鋒
峻拔學殖高明元元本本之羣昔嘗叅於大雅赫赫巖
巖之節今方峻於具瞻往司載筆之權益顯用儒之效
毋煩固避其即欽承所辭宜不允

賜定江軍節度使侍衛親軍步軍都指揮使興

州駐劄御前諸軍都統制吳挺辭免除利州

西路安撫使兼知興州恩命不允詔

閏六月十日

昔在紹興即蜀北境分置二帥東治漢中西治葭萌皆

擇良將並付兵民之任折衝固圉蓋良法也今朕復還舊制丕輯事功適卿來朝故有因任之寵且皆卿父故官也威聲在軍遺愛在人以卿之才諒思濟美親嫌細故勿復以云所辭宜不允

賜朝請大夫試尚書吏部侍郎兼侍講程大昌

辭免兼同脩國史恩命不允詔

閏六月十一日

筆削之任難矣而况鋪張四朝大典於簡編闕軼之後歲月侵尋之久其為難也抑又甚焉非時名儒孰訖功

緒卿才足以擅述作學足以貫今古識足以辨是非具此三長實曰良史往率同職孜孜不怠趣以成書來上毋為退之之遜避可也

賜朝散郎試右諫議大夫蕭燧辭免除刑部侍

郎恩命不允詔

閏六月十四日

司寇職掌刑貳卿班高法從朕重此選每難其人卿以學問甲進科以靖共儀清貫久居諫省備殫諷議之勞擢佐秋官方藉論思之益遽披封奏蘄避寵榮顧成

命之已孚豈謙懷之可徇所辭宜不允

賜觀文殿學士大中大夫知建康府充江南東
路安撫使兼行宮留守劉拱乞檢會前奏除

一在外宮觀不允詔

閏六月十九日

朕深懲守帥之數更不遴擇循良而久任眷陪都之重
地煩宥府之舊人逮此累年底於多績召公南國當自
適於憇棠裴度北門顧奚妨於卧鎮寧容引疾遂欲合
符勉思自養之方庸體仰成之意所請宜不允

賜隨龍永州防禦使添差權發遣兩浙西路馬

步軍副總管臨安府駐劄李厚辭免特轉行

一官再任恩命不允詔

閏六月十九日

附翼攀鱗古今攸重刈著取屨賢哲所嘉眷乃舊臣從
予資善每念閱時之久寧忘奉事之勞而况謹飭無違
踐揚有譽爰峻加於使範併因任於戎昭祇服恩章毋
馳遜牘所辭宜不允

賜皇子荆南集慶軍節度使開府儀同三司行

江陵尹判明州軍州事兼沿海制置使魏王
愷辭免除永興成德軍節度使雍州牧加食

邑食實封恩命不允詔

閏六月二十五日

唐虞分任州牧與揆岳等故咨二十二人欽亮天功而
牧在焉茲朕稽古俾予賢子建牧於秦而又易以雙節
衍以多戶庶幾上下相維內外咸治無愧乎帝者之時
一已制書既誕告矣理難固避往肅而承所辭宜不允
賜皇子荆南集慶軍節度使開府儀同三司行

江陵尹判明州軍州事兼沿海制置使魏王
愷上表再辭免除永興成德軍節度使雍州
牧加食邑食實封恩命不允不得再有陳請

詔

閏六月二十七日

漢世循良賜爵八年之後舜朝岳牧陟明九歲之間惟
我賢王蔚為良翰以其政則何慚於愈治以其時則適
契於咸熙用考彝儀優加異數雖示親親之意實昭貴
貴之公典冊方頒封章毋再所辭宜不允不得再有陳

請

賜皇子荆南集慶軍節度使開府儀同三司行
江陵尹判明州軍州事兼沿海制置使魏王
愷再上表辭免除永興成德軍節度使雍州
牧加食邑食實封恩命不允不得更有陳請

詔

閏六月二十九日

周官以九兩繫邦國之民牧為之守其任可謂重矣今
將舉久虛之典旌異等之效非吾賢王孰克當此汝以

大雅不羣之資濟克勤小物之美孜孜民政夙夜不怠
休聲善狀日徹聽聞朕甚嘉之夫論功行賞雖疎遠之
臣不敢遺也况親而近乎遜章疊來於禮為過所辭宜
不允不得更有陳請

賜龍圖閣學士朝散大夫提舉隆興府玉隆萬
壽宮胡銓辭免除端明殿學士依舊宮觀恩

命仍乞檢會前奏許休致不允詔

七月二日

因殿名官起於麟趾初以待文學之士而已爰暨本朝

恩禮隆重非執政大臣若侍從者德未有徑躋而躡至者以卿早居朝列言衆人之所不敢言久徙炎荒處衆人之所不能處無窮之報乃在於今故天畀卿以壽考康寧而朕賜卿以高爵厚祿尚堅壯志迄獲我心告老常儀毋容數至所辭宜不允

賜皇太子永興成德軍節度使開府儀同三司
雍州牧判明州軍州事兼沿海制置使魏王

愷辭免擇日備禮宜允詔 七月二日

古者之待牧伯也名位不同禮數亦異是以冊拜有九儀之命來朝有三夏之享今朕欲舉行盛典而爾乃執謙固辭雖拂慈懷姑成美志所請宜允

賜少保右丞相史浩乞歸田廬不允詔

七月三日

人主職在論相王臣義存匪躬朕既圖任舊人而有為卿宜永弼乃后而無怠中外望治旰宵仰成顧閱時之尚新胡引疾而求去自計固得民瞻謂何其益勵於壯猷以丕凝於美化所請宜不允

賜昭慶軍節度使知太平州軍州事楊僕乞除

一在外宮觀差遣不允詔

七月五日

卿前上書丐還郡紱朕固嘗諭卿久任之旨矣今纔數月囊封隨至何其遽耶且年豐事簡民氣和樂古人所謂卧治而坐嘯者正可跂其高風毋切切以奉祠為言也所請宜不允

賜少保右丞相史浩上表再乞解罷機政不允

不得再有陳請詔

七月初五日

朕觀西漢二百餘年間丞相再至者惟周勃孔光二人而已今朕臨政願治十有七載而登庸舊相實自卿始則夫疇咨之審倚注之厚期望之切不待言而信矣無故上印朕何賴焉且三年虛位而求之數月閉閣而去之同心同德當如是乎其悉予懷勉安厥位所請宜不允不得再有陳請

賜寧武軍承宣使知閣門事兼客省四方館事

張掄乞除一在外宮觀差遣不允詔

七月十二日

卿胄緒高華辭章精敏恪奉清閒之燕肅提臚句之傳
閱歲滋深結知方厚茲因似續之故驟上退閒之章擁
膝而歌當念陶朱之達頓頭以喻更思韓愈之言况聞
有子之克家毋廢乃心之存闕所請宜不允

賜宣奉大夫提舉臨安府洞霄宮魏杞辭免復

端明殿學士恩命不允詔 七月三十日

朕待遇臣工懋昭恩意有懷舊相何吝寵章卿制行安
和受材博敏自釋台衡之寄久從祠館之游既嘗簡於

異知宜浸還於秘職雖身居外服許適燕閒而名繫內朝實隆體貌毋煩懇避往即欽承所辭宜不允

賜奉國軍節度使殿前都指揮使王友直乞除

一宮觀差遣不允詔

八月八日

卿以智略公忠為朕倚信久典禁衛士心服焉惟勤勞弗懈之故節宣或爽遣醫予告昭示眷懷軍政既修何憂廢事卿其省思慮親藥石以速有瘳之喜稱朕意焉所請宜不允

賜特進觀文殿大學士新判隆興軍府事兼管
內勸農營田使充江南西路安撫使馬軍都
總管陳俊卿辭免差知建康府恩命不允詔

八月十日

大江東西並置連帥其屬任等耳若乃外控淮甸內屏
浙右建牙作牧兼寄留都之管籥則於選擇抑又重焉
卿蚤傳初潛簡知惟厚久儀宰路望實具孚前以從臣
攝行帥事凡兵民之利病江山之形勝固嘗深思而熟

講矣嗣成前績人胥謂宜矧卿不憚暑行既開洪府今
秋高氣爽舟輿安適造朝之鎮乃復告勞乎式過其驅
毋過朕命所辭宜不允

賜中奉大夫試吏部尚書韓元吉乞畀一州郡

不允詔 八月十一日

治官在六卿中號為劇曹欲觀厥成必久其任卿心潛
學問世濟材猷自陟從班即周旋銓綜之地庶幾精通
法意檢柅吏姦吾士大夫按格而至者功罪得其平能

否當其分則其為報効也豈不賢於宣力一州乎所請
宜不允

賜中奉大夫韓元吉辭免除龍圖閣學士恩命

不允詔 八月十四日

恭惟太宗以武定并汾以文致泰平聖謨寶訓實與河
圖洛書相為表裏祕藏廣內冠於西清自非名臣豈容
假寵卿詞章近古學術造微領袖從官閱時浸久懇祈
治郡莫得而留隸職其間人以為允尚欽異數佇考民

功所辭宜不允

賜宣奉大夫提舉臨安府洞霄宮魏杞再辭免
復端明殿學士恩命不允不得再有陳請詔

八月十五日

通班秘殿允藉告猷賦祿公朝固將稱事若乃待遇無
分於中外褒優不廢於燕閒此本朝之至恩實前代之
闕典卿溫恭夷雅久踐周行敏達純明常居揆席雖歸
從於家食仍簡在於子裏錫以寵光續其廩稍既示均

休之意抑昭馭貴之公往即欽承毋煩多避所辭宜不
允不得再有陳請

賜敷文閣直學士中大夫陳彌作上表乞守本

官職致仕不允詔

八月十七日

朕以卿風力強敏老而未衰方即家居寵卿以二千石
之印綬是豈掛冠神武時乎泉南大邦為朕亟往且鄉
閭在望素知其習俗便道之鎮靡勞於行役使卿擇地
何以加之勉勤布宣圖所以稱此者所請宜不允

賜昭慶軍節度使知太平州軍州事楊俊辭免
知隆興府恩命乞檢會前奏除一在外宮觀

差遣不允詔

八月二十四日

朕顧瞻吳楚之間襟帶江湖之會古為督府今號潛藩
每咨擇於重臣往增隆於制閩卿器資沉裕材韞疏通
蚤更踐於劇繁嘗參聯於宥密適茲謀帥無以易卿與
其從容千里之中未殫遠略孰若鎮撫十連之重益著
多庸亟思承命之恭難徇均休之志所辭宜不允

賜中大夫試刑部尚書張津乞除一在外宮觀

或近地小郡差遣不允詔

八月二十七日

卿夙蘊才猷蚤更事任浙水股肱之郡久賴蕃宣文昌
喉舌之司肆加選擢自帥五刑之屬僅踰半歲之間曳
履方榮乞麾何遽其效論思之益以承眷獎之恩所請
宜不允

賜昭慶軍節度使知太平州軍州事楊傑上表

再辭免知隆興府恩命不允不得再有陳請

詔九月一日

朕於謀帥可謂難矣既欲其資望之高使列城奉令而承教又欲其政事之敏為斯民興利而除害兼是二者在卿為宜故自偏州改臨鉅鎮節旄增重榮戟有光往布藩條寬吾西顧逡巡固避豈所望哉所辭宜不允不得再有陳請

賜敷文閣直學士中大夫陳彌作辭免差遣知

泉州恩命不允詔 九月二日

泉南地大民衆為七閩一都會加以蠻夷慕義航海日
至富商大賈寶貨聚焉獄市之繁非他邦比也朕思得
政事彊明廉平不擾者付之符竹閱從臣之籍無以易
卿已趣開藩勿勞謙避所辭宜不允

賜資政殿大學士中大夫知福州軍州事充福
建路安撫使沈復乞除一在外官觀差遣不

允詔 九月二十一日

卿儒猷吏方克自懋勉服休服采中外具宜向繇南徐

往鎮閩部裕乃民如康叔克勤小物如畢公日需政成
丕勸列郡遽思避寵殊異所聞詩不云乎樂只君子殿
天子之邦樂只君子萬福攸同顧豈以滿盈為慮哉所
辭宜不允

賜中大夫新任在外宮觀張津辭免除數文閣

學士恩命不允詔

九月三十日

乃文徽祖有倬宸章飛閣緣雲蔽巖惟謹於茲列職允
謂高華以卿久踐班聯屢更蕃服比從璽召入長憲曹

今聽均休豈無異數肆因舊直益進其班往服恩光毋
為遜避所辭宜不允

賜少保右丞相史浩叅知政事趙雄辭免幸秘

書省推恩特轉一官恩命特依所請詔 十月

十二日

先民有言天子所至曰幸謂非臣下可得而冀也日朕
親臨東觀歷覽圖史遠繩祖武之休近踵紹興之盛凡
在三館咸進秩一等用侈榮遇矧卿以鴻儒碩輔兼太

史公之任顧可獨已乎成命方頒遜章遽上永惟將順
有素固不當以疑似為嫌雖然周官八柄予以馭幸云
者蓋太宰詔王馭羣臣而非以馭大臣也其趣銷印庸
示尊禮且著夫謙德之美焉宜特依所請

賜中大夫參知政事趙雄再辭免玉牒所進書
充禮儀使特轉一官依例加恩恩命不允不
得再有陳請詔

卿以造微之學任重之器服在廊廟謀猷日嘉朕所以

期卿者遠矣豈以一官為輕重哉然國有盛典卿實相之恩禮所加不容廢也且熙寧而上凡登政路階必四品今茲進選朕方以為晚卿猶固避何哉所辭宜不允不得再有陳請

賜少保右丞相史浩辭免玉牒所進書轉兩官

特許回授依例加恩恩命不允詔

十月十六日

派皇室之璿源書首成於章聖上仁朝之玉牒禮嘗講於熙寧兼二典以奏篇審一時之能事卿儒猷碩大德

量淵宏儼袞繡以端朝總搢紳之載筆進官懋賞厥有
前曩錫命馳恩已從雅志尚茲固避毋乃過謙所辭宜
不允

賜少保右丞相史浩上表再乞解罷機政不允

詔 十一月十三日

朕比煩舊德再幹洪鈞以公歸兮方喜繡裳之見於良
足矣遽念赤松之遊今庶職交脩四方無警廟堂之上
固可雍容事物之來不難酬酢當效大雅老成之助毋

專道家止足之思所請宜不允

賜端明殿學士朝奉大夫簽書樞密院事錢良

臣辭免除叅知政事恩命不允詔

十一月十七日

朕以西樞本兵權以東府議國政其在二柄固有所分
至於聚精會神修明治道而圖國家長久之術則二三
執政倚注一也卿學問器識議論風采絕出漢廷之右
君臣契合所謂不膠漆而固者茲從宥密進於疑丞非
以卿文武憲邦左右具宜故耶成命已行何避之有所

辭宜不允

賜新除少傅史浩令所司擇日備禮冊命辭免

宜允詔

十一月二十一日

宏化貳公位崇禮重大延延拜古有彛章卿以舊學之
良懇還相印進班左棘昭示隆恩方詔攸司洎辰作冊
遽披封奏祈寢縟儀謙德有光數嘉無數所請宜允

賜右丞相趙雄辭免提舉國史院提舉國朝會

要所恩命不允詔

十一月二十二日

本朝以宰相分領三館定其位序今朕揚祖烈類故寔而命相臣兼掌斯事亦是意也卿學足以經世文足以華國自初識擢固嘗秉東觀之筆修四朝之史矣今以丞相之重總提大綱使諸彥有所奉承二書不至闕軼是亦儒效之一端也何以遜為所請宜不允

賜朝奉大夫叅知政事錢良臣辭免監修國史

日歷恩命不允詔

十一月二十二日

起居有注時政有記萃於東觀加纂修焉國家之大典

也卿學識高明文辭瞻麗疇厥望實服在左右凡朕出入言動固已目擊耳聞而政事弛張人材進退又皆參豫而奉行之矣總率諸儒以事繫日使是非不失其正而可以傳信於萬世固其職也又奚遜焉所辭宜不允

附奏

臣今月二十二日准御封下參知政事錢良臣辭免監修國史日歷所劄子一道除已草不允詔進入外其間偶有所疑理合奏稟臣竊謂國史日歷者書名

也曰所者官司也若提舉則可言某所而謂監修則止當作監脩國史日歷今內尚書省批旨却作監修國史日歷所似多寫所字若就出勅改正頗為允當又乾道元年春命參知政事錢端禮虞允文分領書局時並按景德間參知政事王旦權領史館故事各帶權字自後十餘年間執政皆用此制所降指揮却無權字是以錢良臣奏劄云疑丞兼領止加承攝之名忽冒直除茂聞其比若是特出聖意固無不可或

一時偶然差誤臣以職守所及亦合奏知併乞睿照
賜昭慶軍承宣使提舉佑神觀士歆辭免除保
康軍節度使依前提舉佑神觀恩命不允詔

十一月三十日

周漢世祚久長蓋得同姓藩維之助朕用時憲丕傳為
恩卿屬近行尊謹飭而信厚司留務於兩使逮今十年
載疇厥勞俾領名鎮擁旌授鉞克壯宗盟亟其親承副
我親親之意所辭宜不允

賜新授中大夫參知政事錢良臣辭免同提舉

勅令所恩命不允詔 十二月四日

夏有政典商制官刑周命六卿垂法象魏因時損益雖
或不同合於人情其揆一也卿博習今古有猷有為以
助萬機方資碩望參裁三尺更藉通儒往貳相臣講明
畫一俾予憲度不愧盛王茲惟汝諧毋拂朕懷所辭宜
不允

賜右丞相趙雄辭免提舉編修玉牒提舉勅令

所恩命不允詔 十二月四日

堯親九族蓋重本支漢約三章務宗簡易成書未備後
世何觀屬命朝紳交修鉅典茲煩相紘併總宏綱御識
際天淵學窮今古洪鈞獨運固已優為衆職咸隆特其
餘事矧從近比庸示至懷遜牘雖來渙恩難格所辭宜
不允

賜昭化軍承宣使錢愷辭免知閣事幹辦皇城

司恩命不允詔

君門九重尤嚴於上閣宮隅七雉實護於中宸肆擇舊
人兼螭要職卿明懿之季子仁皇之外孫家傳忠孝之
風世席高華之寵竭違班著久即燕閒茲趣對於便朝
蓋深嘉於宿望榮頒疊組日侍垂旒尚欽眷獎之恩毋
守謙冲之節所辭宜不允

淳熙六年

賜降授中大夫新知泉州軍州事韓孝直辭免

敷文閣學士恩命不允詔

正月七日

朕甚重爵賞不妄予人有能趨事赴功則無所吝故雖
踈遠之士尺寸之勞未嘗遺也而况於侍從之臣卿夙
蘊才猷所臨底績永嘉之政威信並行海道宿奸俘獲
殆盡為守將者不當如是乎峻班西清蔽自朕志庶幾
九牧咸勸有功成命已敷豈容遜避所辭宜不允

賜皇弟璩上表再辭免除少傅加食邑食實封

恩命不允不得再有陳請

正月二十三日

朕上奉親權以隆孝治下敦友睦以壯宗盟雖覲會之

有常顧豆籩之無遠卿醇和毓性愿慤提身祿富萬鍾
靡期忒侈位高九棘彌戒驕矜當國家閒暇之時享祠
館燕安之樂稽其積閱寵以殊遷既昭馭貴之公亦廣
因心之愛廷揚惟允謙執謂何所辭宜不允不得再有

陳請

賜朝議大夫試尚書吏部兼侍講兼同脩國史
兼權吏部尚書程大昌乞在外宮觀差遣或

小郡不允詔

二月三十日

卿強學力行遇事不苟躋登從列自結眷知天官劇繁
正倚銓綜遽求外補殊異所期朕方汲汲人才惟恐用
之弗盡既擢用矣輕聽其去可乎祇率厥常益擴素蘊
所請宜不允

賜降除朝請大夫叅知政事錢良臣辭免纂修
日歷特轉行兩官依例加恩命不允詔三

月二十七日

朕聞漢興五世隆在建元外攘夷狄內修法度改正朔

易服色當是時乃有司馬遷斷自太初著為今上本紀
豈非親見者其事詳傳聞者其辭略以時纂錄固太史
氏之職歟朕祇承內禪歷年於此雖宵衣旰食發政施
仁不敢不勉顧閱休偉績未有以光汗青副墨之傳也
今卿以輔弼真才筆削大手總率諸彥奏成鉅篇翰墨
策勲實為之冠進階一等仍行戶封懋賞維公孚今維
信遜章來上非朕意馬所辭宜不允

賜正議大夫右丞相趙雄辭免曾經預監脩纂

隆興以後日厯奏成篇帙轉行一官依例加

恩恩命不允詔

三月二十七日

昔房喬相唐太宗欲自觀史喬初不可已而為今上錄
獻朕謂太宗欲觀固失矣喬不能守其亦豈為得哉今
朕不然時正付之史筆故事也書成不自觀焉故事也
褒賞舊勞自丞相始亦故事也况卿早游東觀文規六
經嘗總宏綱勲在太史疊是二者而進一官賞非無功
得豈云幸方將消辰下制告於百辟以侈真儒之效丞

相安得而遜避哉所辭宜不允

賜太中大夫樞密使王淮辭免曾經預脩纂隆
興以後日歷奏成篇帙特轉行一官依例加

恩恩命不允詔

三月二十七日

後漢公卿有所撰述始集公府乃上蘭臺唐制專命大
臣纂錄時政記送史館蓋獻替之語非四近莫得而聞
傳信之辭非史官莫得而預事大體重實相關焉卿卿
以鄭公之學典領秘書比事屬辭齊驅班馬迨乎近歲

徧執事樞日紀見聞授之東觀今茲勒成大典固宜甄
錄舊勞已詔有司刻增秩之贊並書社之數毋煩控免
稽我成命之行所辭宜不允

賜龍圖閣學士中大夫新除致仕林安宅辭免
除端明殿學士乞守舊職名致仕不允詔 三

月二十八日

朕於適臣恩意厚矣年至而告老則固留之留之不可
則優之所以隆體貌風俗也卿精明敏達廉潔公勤一

去樞庭久更歲律雖登耄艾體力未衰納祿之言數聞
朕聽升華殿幄歸貴鄉閭祇服寵光毋煩謙避所辭宜
不允

賜朝議大夫新除權吏部尚書兼侍講兼同修
國史程大昌辭免國史日厯所經脩不經進

官特轉一官恩命不允詔

四月三日

朕出入起居惟恐不欽發號施令惟恐不臧史氏所書
庶或無愧雖然此特兢兢日行其道耳豈敢自以為多

若乃歲奉玉卮以介親壽紹業之孝彌億萬年無有窮已
其於簡冊實有光焉茲朕所以因篇帙之成推賞而致
其善也書不云乎一人有慶兆民賴之况卿古學英辭
嘗與聞筆削之事進階示寵於理則宜又何遜焉所辭
宜不允

賜朝奉郎權尚書工部侍郎兼知臨安府吳淵

辭免除工部侍郎恩命不允詔

四月五日

六卿置貳班著甚崇再歲為真典常具在若乃才術素

高於當世政聲藹著於行都何待序遷當從明陟卿性
資開爽識慮精深比擢預于論思旋兼釐於浩穰鋸筦
弗設吏自畏其公明枹鼓稀鳴民咸安其豈弟就陞惟
亞庸獎厥勤宜進服於恩章毋退循於冲節所辭宜不
允

賜龍圖閣學士中大夫林安宅再辭免除端明

殿學士恩命不允不得再有陳請詔

五月十九日

引年納祿深嘉止足之高馭貴疏榮遐念樞機之舊既

兼隆於異眷宜申錫於徽章卿廉介有常疏通無滯雖
年齡之寢晚在體力以猶強懇辭真館之游聽遂安車
之適升華秘殿示寵故卿其趨拜於恩綸毋數勤於遜
牘所辭宜不允不得再有陳請

賜正奉大夫右丞相趙雄辭免勅令所修進一
州一路酬賞格法了畢特轉一官依例加恩

命不允詔 七月十六日

八柄詔王宰司之職三章約法相國之功卿名世鉅儒

格天良弼比總提於定令賴筆削以成書賞典具昭更
姦咸革操以為驗稽以為決寧復竒它行此之信執此
之堅方資端亮推恩惟允避寵何嫌所辭宜不允

賜中奉大夫參知政事錢良臣辭免勅令所修
進一州一路酬賞格法了畢特轉一官依例

加恩恩命不允詔

七月十六日

福威惟辟固出一時輕重貶功當存三尺卿爽邦哲輔
博古鴻儒比貳政機參裁賞格制而用之謂之法既遂

崇成推而行之存乎通更資格守以應無窮之緒斯為
可久之規遷秩則宜執謙毋過所辭宜不允

賜朝議大夫試兵部侍郎兼詳定一司勅令賜

紫金魚袋劉孝韙辭免勅令所脩進一州一
路酬賞格法了畢特轉一官恩命不允詔七

月二十日

郡國之吏賫伐自言於有司者衆矣可以與或抑之可
以無與或得焉宜為成書以布大信卿博通今古明習

憲度遊絲侍從參預討論達茲奏篇寵進華秩理不可避其敬承之所辭宜不允

賜龍圖閣直學士中大夫成都潼川府夔州利

州路安撫制置使兼知成都府事胡元質乞

除一在外官觀差遣不允詔

七月二十四日

卿文能綏衆武可威敵頃被簡擢往臨坤維細大之務畢親兵民之政交舉朕所以釋然寬西顧之憂者資卿力也今上下相安邊鄙不聳正宜輕裘緩帶樂其成功

奚為上書求代耶昔韋舉李德裕鎮蜀咸有嘉績雖曰
才智絕人亦惟朝廷久任之效尚勤宣布予不汝忘所
請宜不允

賜中大夫參知政事錢良臣辭免叙復三官於
見今官上轉行恩命不允詔

九月二十四日

維我仁皇公於刑賞於時貳政曰度曰庠嘗削文階伸
其後効務隆體貌旋俾如初著之史編朕用時憲卿知
周物表學探道原參預政機夙夜匪懈比坐謬舉懇求

自懲眷知日深固欲甄復矧遇恩霈豈拘叙菴禡以終
朝昔成卿志接於晝日今著朕心君臣之間恩義兩得
祇服顯命毋煩遜章所辭宜不允

賜朝請郎試右諫議大夫謝廓然辭免除刑部

尚書不允詔

九月二十六日

分職文昌夙高八座持平憲部專掌五刑匪躬哲乂之
資孰副選掄之意卿器闕學博識遠慮周負疏通應務
之才持慷慨濟時之論揚歷具知於民隱簡求自結於

郎潛執法烏臺屢奮鷹鷂之擊通班騎省每嘉藥石之言欲增重於禁塗俾進解於端右祇承定命毋事勞謙所辭宜不允

賜敷文閣學士太中大夫知泉州韓彥直乞特

除一在外宮觀差遣不允詔

九月二十九日

卿才猷聰敏政術精明獻納論思嘗率六官之屬中和宣布交騰兩郡之聲雖白雲之望良勤顧皂蓋之臨未久方懲數易姑復少安所請宜不允

賜特進觀文殿大學士判建康軍府事充江南

東路安撫使兼行宮留守陳俊卿再上表乞

致仕不允不得再有陳請詔

九月二十九日

鮮我方將詠於詩雅若不得謝著於禮經矧當未至之年難徇必從之欲卿弼諧宿望屏翰重臣雍容天塹之都坐嚴管籥泔浴靈河之潤遠及邦畿方共謹之是圖在告歸而何遽精神尚壯盍思楚邱老之成言用舍或殊毋執歐陽脩之故事所辭宜不允不得再有陳請

賜少傅昭化軍節度使充醴泉觀使嗣王士輅

辭免除少師加食邑食實封不允詔

十月十六日

朕念昔祖烈視今宗盟安懿曾孫王為最長五朝近屬
王乃獨存在眷禮以當殊豈他人之敢擬茲以慈皇慶
壽躡升亞傅之班宗祀均釐特貳維師之秩茲為異數
安事常謙所辭宜不允

賜皇兄少保岳陽軍節度使充萬壽觀使永陽

郡王居廣辭免除少傅加食邑食實封不允

詔十月十六日

於赫仁宗有嘉允弼王於列郡親則諸兄當肇講於宗
祈實參陪於酌獻尋加相紱用侈神釐昔常著於簡編
今適同於符契特升孤棘庸厚親賢何必抗章亟思承
命所辭宜不允

賜新授少師昭化軍節度使充醴泉觀使嗣濮
王士輅辭免令所司擇日備禮冊命宜允詔

十一月十一日

屬者裸將太室命王分獻於別廟均釐第賞已陟闕亞
乃貢封章懇辭冊拜將何以稱吾優異之思乎雖然年
高而禮彌恭爵隆而志愈下此謙爻所以皆吉其詔有
司如王之志載循冲守良切嘆嘉所請宜允

賜新授少傅岳陽軍節度使充萬壽觀使永陽
郡王居廣辭免令所司擇日備禮冊命宜允

詔 十二月十一日

漢制大臣多延拜於廷晉氏以來亦間行此禮茲於敷

錫祭澤寵褒近親孤棘之班進居其次臨軒授冊於古
有稽載閱來章固辭盛典其從雅志以著夫謙德之美
焉所請宜允

淳熙七年

賜武翼郎監潭州南嶽廟趙子棟辭免除宜州

觀察使安定郡王恩命不允詔

二月三十日

朕懷藝祖創業之功考熙寧釐封之制久虛厥次今得
其人卿率履有常宣勞惟舊既推屬籍之近復騰年齡

之尊峻陟庶車就開王社冀輒朝於魏闕庸增壯於宗盟避寵之言非予所望所辭宜不允

賜朝請郎權尚書禮部侍郎兼侍講齊慶胄辭

免除禮部侍郎恩命不允詔 三月二十四日

舜雖三載考績三考陟明然伯夷典禮后夔典樂實未嘗易所謂陟者但進其位序加其爵服而已卿以瓌姿偉望通才與學為朕簡擢累年於茲莅臺屬亞奉常佐宗伯凡郊廟之祭祀禮樂之情文或糾正其儀或討論

其事俾予一代制作不愧於古時維汝嘉真拜貳卿庸
宿其業服章著定寵渥俱隆師言允諧古誼亦協無煩
多避往即欽承所辭宜不允



文忠集卷一百九